



**Musiala tanabenbuba
ground telung nung lao**

**Imran Khan tang tashi mozü
kidangi anir mao**

VOL. XXIII ISSUE NO. 308 (ADOK 308) DIMAPUR YANGTEPNÜ (THURSDAY) LUROI (AUGUST) 20, 2026

₹ 5.00

Zunheboto nung NH-702A anenzüka ao



August 19, 2026 nü New Colony, Zunheboto nung National Highway 702A anenzüka aoba noksa nung angur.

Dimapur, August 19, 2026

(Agencies): Bodbarnep Zunheboto kübok New Colony nung anentsüh tulu ka alu aser iba lendong nung National Highway 702A anenzüka bener aoba ajanga traffic nung timtem ajurua lir.

Ali anenzüka mao tsüngda iba temeket nung ki asem nungi nisungtem aniena liasü aser parnok anienba sülen anentsüh ajanga ki ajunga raksatsüogo.

Maneni, iba tesem anasa ki ka tera raksaogo aser iba ajanga temeket nung tanga kiojen atema khuret tulu ajurua lir.

Anentsüh aluba ajanga NH-702A shibang aser ketdangsürtemi traffic movement tenzüksü atema mapa

inyakdar.

Iba osang zülu tashi nung nisung asüba mesüra yiruba kecha mali.

Ketdangsürtemi anentsüh ajanga kiojen aser gari lenmang nung teraksa bentsür aruba asadangtsü.

Lendong atalokba sülen Zunheboto Deputy Commissioner Dharam Raj-i Indian Red Cross Society nungi anguba relief packages lema agütsü.

Deputy Commissioner Raj-i anentsüh agi kongshiba kibongtem nem essential supplies agütsü aser takoksa ajuruba kibongtem den ajurutepa district administration-i nüngdakba teyari agütsütsü nangzüka liasü.

Mokokchung nunga 'World Photography Day' amung

Mokokchung, 19th Aug

(TYO): Alima ajunga den külemi Mokokchung nunga Mokokchung Photography Club (MPC)-i taküm küm asoshi shimtetba omen “home” dak rangkloker ‘World Photography Day’ nüngtem sentong ka MMC conference hall nung ayongzüka mungogo. Iba sentong nung photographer-tem den noksa tangoktsü jangrartem, MPC mezüng tenzükertem aser osangbenertem densema liasü.

Sentong nung tetushi tesemdanger Mokokchung DRDA Project Director, Imyapangla-i jembidang, photography ya noksa tangokba kisüng dangbo masü, ibai noksa tangokba dang nungi alia inyakba mapa ka lir, ta ashi.

Asenoki noksa reprangdang noksa kisüng merepranger, iba yagi mapang indang ashir, otsütem yimdangi arudaktsür aser iba yagi süiren indanga sayur.

Koba noksa südir süaka noksatemji photographer karibosa tangokba lir, anungji, noksa tangoker dakji tashi tulu lir ta metetang, ta lai ashi.

‘Nai noksa kisüng tangoker masü, nai item temungratsü mapangtem wazüka yutsüba den item otsüji tarutsü putu dang ashitsü. Anungji, “maneni noksa tajung aika tangokdenba den ano nenoki maongka yanglutsü merangang”, ta lai ayongzü.

‘Maneni telung tonga ia angazüktsü merangang, akokba tashi rizünga yuang, aser ne mapa nung maneni tamang ka-ang’, ta lai ajungshi. Tarutsü nung sarkar mapa angutsü ata-a tekazü, ajakibo sarkar mapa inyaktsü maongka mangutsü, kechiyong sarkar mapaji telatet ka dang. Anungji, ‘pei sempet meteta shisatsü angazüker nai langka kar apiteta tagitsü jenjang ka kümdakjang’, ta laisa shisem.

(Maneni tapak 2 nung...)

Congress-i Vande Mataram atema 1937 lemtet nungi masetshir

New Delhi, August 19, 2026

(Agencies): Congress-i 1937 nung Vande Mataram atema lemtet agiba nung masetshii noktaksü tenangzükba agishiogo aser Congress sentong ajak nung national song nung mezügbuba tekong ana dang atentsü.

Bodbarnü Congress Working Committee (CWC) senden nung iba onük benoka lemsatet aser lennir aikati 1937 küm party-i lemtet agiba nungi masetshitsü indang jembi.

October 1937 nung CWC bangzüng nung ajemdaker iba lemtet agir. Iba mapang national sentongtem nung mezügbuba tekong ana dang atentsü telemtetba agia liasü ta Congress-i metetdaksü.

Tesüiba nung Vande Mataram tekong ajunga atentsü-matentsü atema o atsütepa jembi aser tamangba yimsü aser sobaliba balala nungi nisungtem adenshiba national gatherings nung iba ken atentsü meputet ta jembitetba sülen 1937 küm iba lemtet agia liasü.

Iba ken ya 1875 nung Bankim Chandra Chattopadhyay-i zülu aser iba sülen Anandamath nung adoka liasü. Iba ken mezügbuba tekong ana dak alia ano tanga tekong aika lir. Mezügbuba tekong ana nung tetsü tasoli nem tetushi agütsür, tanünga tekongtem nung tamangba yimsü aser tar nunger tetshia lir.

1937 küm nung Congress-i Rabindranath Tagore dang iba ken atema asüngdangtepa liasü. Tagore-i October ita Jawaharlal Nehru dangi züluba shidi ka nung mezügbuba tekong ana ya balaka züngshitsü akok kechiyong national hymn ka ama lir ta shia liasü.

Tanünga tekongtem nung tetshia alibatemji nisung ajak adenba national gatherings den meputeptsü ta Tagore-isa ashi.

Iba nung ajemdaker CWC-i public aser national gatherings nung Vande Mataram mezügbuba tekong ana dang atentsü bangzüng renema ayu.

1937 lemtet ajangasa tayongertemi Vande Mataram den külemi ashishitep maliba national songs atentsü mesüra Vande Mataram meteni item ken atentsü temelaba agüja liasü.

Congress president Mallikarjun Kharge-i Hombarnü South Goa nung public sentong ka nung Vande Mataram ajunga matenba atema aitsüba mapang ka nung CWC-i iba lemtet agiogo.

"Mahatma Gandhi, Jawaharlal Nehru nungeri atenba Vande Mataram ni tenogo. Vallabhbhai Patel aser Atal Bihari Vajpayee nunger atenba ken kasa aten. Ibaji ozüng alema inyakba süra, Gandhiji, Nehru aser Vallabhbhai Patel nunger anema ken o ka benokangma" ta Kharge-i ashi.

"Congress-i national song aser national anthem atema otsüsüa lemtettem agiba BJP-i memetet. Parnok masodang Congress-i national song aser national anthem atema bangzüng renemba parnoki memetet. Tesüiba küm 80 tashi ataloka aruba ama ni inyakogo" ta Kharge-i metetdaksü.

Goa Pradesh Congress Committee president Girish Chodankar-ia Goa nung party sentong nung Vande Mataram atenba pusema metetdaksüogo.

"Vande Mataram atema terata adokdaksütsü meranger. Goa nung Ekvot BLAs and Booth Workers Convention nung President Mallikarjun Kharge aden aser onoki kanga nüma tanga India national song Vande Mataram aten" ta Chodankar-i ashi.

Iba kasa version Mahatma Gandhi, Nehru, Sardar Patel, Subhas Chandra Bose aser Lal Bahadur Shastri nunger dena nüjiso atema rarartem aser lennirtemi aso aika tena aruogo ta pai ashi.

Atal Bihari Vajpayee aser Narendra Modi nungeri yimsüsüba mapang aser ano Chief Minister tem aser political party balala lennirtemi Vande Mataram tena aruogo ta Chodankar-isa ashi.

"Vande Mataram ya India aser India nunger shia meyong lir. Iba ya party madak, politics madak lir" ta paisa shisem.

"Safe Products, Confident Consumer" sentong agi

Kohima, August 19, 2026

(TYO): August 18, 2026 nü Kohima College nung "Safe Products, Confident Consumer" omen nung ajemdaker consumer awareness programme ka agiogo.

Iba sentong ya Department of Legal Metrology & Consumer Protection (LMCP), Kohima-i Economics and Commerce Department, Kohima College den yaritepa ayongzüka agiogo.

Nagaland nung LMCP department ajanga weights and

measures maparen ketdangsüa inyaker.

"Consumer Protection Act ya products aliba aser ayokba atema dang masü saka ajak ayimbanger" ta Advocate & Panel Lawyer, Kohima District Legal Services Authority Sunjib Rana-i ashi.

"Asenoki angazüka yura, ajak meteta akümer aser consumer tajung ka akümer. Kodang asenok consumer tajung ka kümdir na atema lendong maliba product tajungtiba angutsü" ta

Rana-i ashi.

"Consumer kati products balala nungi shimsü temeten lir. Nai product ka majungba mesüra service shitak magütsüba mesüra tim masüba trade practice ken o kar lira consumer court-i aotsüla" ta pai ashi.

"Asenoki kechi product alidir ibaji safety indang tarensen nung tematiba menden nung alitsüla. Nai aritepa product malitsüla kechiyong ibaji asenok atema majung asütsü akok" ta Rana-isa shisem.

Jorhat nung Assam-Nagaland arrtsülen 'night curfew' benoker

Guwahati, August 19, 2026

(Agencies): Assam-Nagaland arrtsülen nisungtemi tashiyim amshia Assam-i arutsü akok ta osang kar angazükba sülen Jorhat district administration-i 'night curfew' benokogo.

Aonung 8:00 ako nungi anepdang 5:00 ako tashi arrtsülen Assam tsütsü kilometre 5 telongtet nung nisung aser gari senzüba noktanger ta Jorhat District Magistrate Jay Shivani-i metetdaksüogo.

Tali bilemloka aoba teloktemi Nagaland arrtsülen nungi Assam-i arutsü merangtsü ta Intelligence Branch aser district police ajanga ashiba osang nung ajemdaker

district administration-i iba tetuyuba agütsüogo.

Tangar aruba ajanga Jorhat district nung timtem ajurutsü akok ta bilema tenokdangba agütsüogo. Arrtsülen aonung senzüsenbong mazüokba ajanga security asoshi lendong bentsür arutsü aser law & order khuret ajurutsü akok ta district administration-i metetdaksü.

Külen, ULFA-I-ia volunteers tasen aniokba osangtem angazüker aser parnoki arrtsülen senzüsenbongtsü aser tanga mapa inyaktsü akok ta administration-isa ashi.

Bharatiya Nagarik Suraksha

Sanhita (BNSS) nung lateta aliba onüktem kübok tenokdangba agütsüogo.

Ajisüaka, iba tenokdangba kübok Army, security forces, police, magistrates, forest officials aser tanga law-enforcement agencies dena official duties inyakertem madener ta Jorhat district administration-isa shiogo.

Tesüiba nunga Assam-Nagaland arrtsülen ibala prohibition orders aser night curfews agütsüogo aser item ajanga interstate crime aser anti-national activities noktangtetogto ta district administration-i metetdaksü.

Mokokchung nung Coffee lu ayimer nem tesayuba agütsü



Mokokchung nung Coffee lu ayimer nem tesayuba agütsüba sentong nung Mokokchung DC Ajit Kumar Verma IAS aser sentong nung adenertem külemi tangokba noksa.

Mokokchung, Luroi/ August 19 (TYO): One District One Product(ODOP)-Coffee ta asüba shisatokden ka tanü Department of Industries & Commerce-i ayongzüka Sangtemla Community Hall nung kaogo.

One District One Product ta asüba ya India sorkari achayanga tenzükba sentong ka lir aser iba sentong ya ajanga India linük ajunga nung district ajak nung pei district nung kechi tsünüsempongtsü apet ibaji tsünüa pei district nung nung tsüksüngongsünga alitsü mangdang nung tenzükba lira ser Mokokchung asoshi coffee shimtet aser tang tashi nung ali temakazük hectare 8000 tema yimtsüng 78 nung coffee lu yimtaki ta tanü iba sentong

DIC Mokokchung nung General Manager Wt.B.Asangla-i jembidang ashi.

Sentong nung Mokokchung Deputy Commissioner Ajit Kumar Verma IAS-i jembidang asen Mokokchung nung coffee-ji ajungtsü ta asateta iba lu ayimtsü aser achayangtsü asoshi asenok nem nungloktsüogo,anungji iba sentong ya ajanga asen Mokokchung nungburtem ajangzüktsü asoshi Mokokchung nungburtem ajaki pei district meima coffee lu-ji yima nentaka inyaksüla ta adenshia aliba coffee lu ayimertem ayongzüka.

Coffee shishitsü asoshi lenmang kanga dang sadem sadema lir, anungji tangari asenok dak temelung lemteta

nungloktsüba ama asenoki tajungtiba nung tsünüa süngjang tangdakja alima nem agütsütettsü aser ibaji ajanga asen Mokokchung ajungkettsü mangdang nung inyak tenzükdi ta Mkg.DC-isa ayongzüka jembi.

Coffee lu ayimertem asoshi Marketing-Opportunities & Channel ta asüba onük E r . T . I m l i s u n e p A o , P r i n c i p a l , G I T I Mokokchung,Branding & Packaging(General) ta asüba onük nung Wb.Atipong Aier,CEO Aier Bakery/Co-Owner Body Balance aser Branding & Packaging(Coffee) ta asüba onük nung Wb.Aliamoa S.Longkumer,Proprietor,Mascot Store & Café parnoki jembia liasü.

SIR 2026 atema Media Cell senden amen

Dimapur, Luroi/August 19 (TYO): Tang inyaka aliba Photo Electoral Roll 2026 indang Special Intensive Revision (SIR) dak sendakba nung Kohima district atema Media Cell senden ka August 19, 2026 nü Deputy Commissioner, Kohima indang Office nung mena liasü.

Media Cell indang mendenpuba aser Deputy Commissioner, Kohima, B. Henok Buchem, NCS-i iba senden nung züngsemtem dang tang teinyakdak SIR exercise indang tongmelang agi rateta ashi aser parnok dang revision process nung ketdangsürtem teinyaktsü indanga angatetdakja liasü.

Media Cell indang züngsem temi SIR exercise indang awareness nungburtem nung tajungtiba nung agütsütsü aser osang prokshitsü indang jembia liasü.

Iba mapang sangdong balala renema prokshiba, media coordination and monitoring, publicity and awareness inyakyim aser official social media sapang tem tajungtiba nung ketdangsütsü indang parnoki jembia liasü.

Iba senden nungsa osang tiazi, meshidak aser nungburtem mashileni anisatsüsa SIR inyakyim dak sendakba osetme azüoktsü indanga jembia liasü. Züngsem temi iba electoral revision nükjidong, yimya aser mapang telatet indang osangtem mapang shidak nung nungburtem nem metetdaksütsü nungdakba indang lemsatet.

Züngsem temi sapang balala amshia SIR exercise indang awareness agütsütsü, District Icon aser tanga tapet media channels ajanga nungbur timba nem iba osang sangoktsütsü indanga parnoki jembia liasü.

Hannah Roshan Brown-i züluba “The Road to Tiyong” kaket saya



“The Road to Tiyong” Mungulbarnü yangi The Play Café Mokokchung nung Lanukaba Imchen-isayatsüba noksa nung angur.

Mokokchung, 19th Aug (TYO): Aliba nung tamo Hannah Roshan Brown-i tanurtem dak rangloker English oshi nung züluba kaket ka tenüng agi “The Road to Tiyong” Mungulbarnü yangi The Play Café Mokokchung nung la teko Lanukaba Imchen-i sayatsüogo. Iba sentong nung kaketzülur kibong, kidangkimgang aser medemertem densema liasü.

Lai iba kaket ya Nagaland nung aliba tanurtem dak rangloker züluba lir. Tesüngmangtsü lima angutsü asoshi bendang lima talang bushia aotsü menügdaker. Asen meketa aliba reprangang, na tetsüng ajemokdak ajaklen tobur tajungji lir. Iba kaket yagi nai ner ki sabua bushitsü, ne tera indang tali angazüktsü aser nai ner lima jangratema benjongtsü imlar, ta tezüluri metetdaksü. Iba otsü yagi tanurtem kaketzülur yimya sübadaktsüba den tajungshiba angutsü imlar, ta laisa shisem.

Iba kaket nung tapu 6 lir - “An Adventure Awaits”, “Beyond the Classroom”, “The Road to Tiyong”, “The Heart of the Farm”, “A New Dawn” aser “Until the Next Time”. Otsütemji lar kibong nung ajangshibatam teimba lir. Iba kaket nung Mongsen oshi kar zülusema angutsü.

Iba kaket nung Fazl Ali

College Mokokchung nung tesayur Dr. Bendangrenla S. Longkumer-i omasa (forward) züluba lir aser sentong nunga lai mapang tatsüka agia kaketzülur indang lai angatetba olen kar lemsatet. Director of Mission & Training FGAG, Bangalore, Dr. Basant Prakash-i iba kaketzülur meshitettsü.

Kaketzülur Hannah Roshan Brown ya England tsür lir, la 2015 nungi Nagaland nung alir. Tanübo la Aliba nung Limaonen Imchen den kibong kümer Mokokchung town nung alir. Tsüngremi par kibong nem tanur tajung asem moaja lir. Tezülur ya tetsü tajung ka dang masü Jubilee Memorial School nunga tesayur aser Mokokchung Play Café ya-a lai anepalur.

Iba kaket ya tanurtem atema dang masü saka tsüraburtem asoshia sakuku tongtibang asütsü, kechiyong yangi anatsülen tangazüktsü aika lir, ta kaketzülur ka den jembidang pai lemsatet. Iba kaket alinürtemi Mokokchung Police Point F.A.C Bus Stand anasa aliba Nata Company dokan aser Play Café nung angutsü, aser Mokokchung town telungtet nungbo ki tonga bener arutsütsü (free delivery). Iba kaket dak sentakba nung osang tejangja metetnürtemi iba Mobile No. +91 93662 46973/ +919378119582 nung tongteprateptsü akok.

Mokokchung nunga ‘World Photography Day’...

(TAPAK 1 NUNGI...)



Imyapangla-i Mokokchung Photography Club pur indang photo exhibition lapoktsü tangokba noksa nung angur.

“Mapa inyaksü maongka mata-i nai ne sasa mapa apitettsü merangang, aser mapa (job) tazüng kwi lir? ta masü, nai nisung kwi nem mapa inyaksü maongka lapoktsür?” ta asüngdanga kechi mapa südir süaka meranga inyaksü laisa lanurtem dang ashiakang o ka metetdaksü. ‘Sempet aketer aser meranga inyaker metenbo camera ajanga maongka lapoktettsü ngujem tulu angur’, ta laisa shisem. Laisa Photography Exhibition ka lapoktsü aser iba nungji MPC züngsemtemi tangokba noksa kar den tejen camera kar aser tawa

agiba MPC-i taküm omen dak ajemdaker ayongba mobile phone photography tetoktepba nung shilem agirtemi tangokba noksatem sayua liasü.

Mobile Phone photography tetoktepba ya Mokokchung district nung alirtem atema liasü aser nung nisung 66-i shilem agi aser item rongnung Odichuba Ozukum (Sungkomen)-i mezüng jenjang angu, tanabuba nung Akangkobba (Ungma) aser tasembuba nung Tekatemjen Walling (Sungratsü) liasü. Takoker nem kulikaket den senpet sen dena senpettsü, aser item senpetji - Aienla Jamir (BDO, Tuli), Er. Wainungla

Walling (BDO, Kobulong) aser Lanutemjen (BDO, Chuchuyimlang & Changtonya) par aseme tenla-a renemtsü.

Sentong nung MPC mezüng tenzük rongnung Longrangty Longchar-i taoba mapang atalokba den pai ajangshiba otsü kar bener arua temenungratsü lemsatet. Kumlong Baptist Arogo Associate Pastor Imna Jamir-i temoatsü meshia sarasademer sentong tenzük. MPC züngsem Imkongsenlai iba sentong ketdang süa ani. MPC Convenor Takumeren aser MPC Secretary Moamongba nadia shilem agia liasü.



August 19, 2026 nü New Delhi nung UP-Japan Investment Meet 2026 nung Union Minister Ashwini Vaishnaw (abelen nungi tanabuba), Union Minister Shivraj Singh Chouhan (ajichilen nungi tanabuba, Uttar Pradesh Chief Minister Yogi Adityanath aser tangartem tangokba noksa nung angur.

Anogo shia Union minister temi university kaka semdangtsü

New Delhi, Luroi/August 19 (Agencies): Ato kilonser Narendra Modi-i aniba sorkari anogo shia University kaka semdanga lanurtem den parnok tebilemba lemsateptsü atema Union Minister kaka yoktsü tebilemba lir.

Cockroach Janta Party (CJP)-i 'School Thik Karo' (school tem jenjang tajungba küma yanglushiang) campaign tenzükba aser tawa Jantar Mantar nung kaketshirtemi NEET paper leak asüba anema longkak aitba sülen sorkari iba telemtetba agi.

'One Day, One University' programme kübok Union Minister tem nem university kaka lemozükja parnok kaketshirtem den shisa lemsateptsü, onük balala nung parnok tebilemba angadangsü aser kaketshirtem nem sorkar welfare schemes, talisa kaketshirtem aser lanurtem dak sendakba schemes balala metetdaksütsü.

Universities den tongteprateptsü aser Union minister tem lemozüksütsü atema Union education minister Pralhad Joshi aser Youth affairs

& sports minister Mansukh Mandaviya na nem mapa nungloksüogo.

Bodhbarnü Ato kilonser Narendra Modi leniba nung amenba Union Cabinet senden nunga iba onükji süoka o lemtepogo, ta ketdangsertem osang ka ajanga metetdaksü.

University Grants Commission-i ashiba agi, tang linük nung universities ajak senteper 1,300 dak tema lir aser iba nungji central universities 57, state universities 522 aser private universities aika densema lir.

Bengali oshi jembirtem kar Bangladesh nungi anir aruogo: Centre

New Delhi, August 19 (Agencies): Bodhbarnü Centre sorkari Supreme Court dang, Bangladesh senso asütsü südi, ta melung melemi Bengal nungi Bangladesh-i meyipa yokba Bengali oshi jembirtem kar tanaben India-i anir aruogo, ta metetdaksü.

Supreme Court bench nung züngsemtemji Chief Justice Surya Kant den justice Joymalya Bagchi aser justice V Mohana nunger lir.

Calcutta High Court-i Bengali oshi jembirtem tanaben India-i anir arutsü tuyuba anema Centre sorkari ken o benoka liasü, ajisüaka Supreme Court-i ken oji agentsüogo.

Bangladesh-i meinzüka yokba nisung kar atema ken o jembitsür, senior advocate Sanjay Hegde-i bench dang, Solicitor General Tushar Mehta

tiyongtsüi aita inyakba ajanga iba tebilemtsü onük bentetogo, ta metetdaksü.

"Pai tiyongtsüi aita inyakba atema ni pa (solicitor general) dang pelar. Iba onük ya bentetogo aser parnok ajak meyipa aruogo," ta Hegde-i ashi.

Iba sülen bench-i, parnok India-i meyipa aruogo, anungji iba ken o anendaka ayutsü menüngdak, ta shia temepishiba ken otemji agentsüogo.

May 22 nü Centre sorkari bench dang, tamalen Bangladesh-i meinzüka yokba nisung kar tanaben anir arutsü atema sorkari telemtetba agiogo, ta metetdakja liasü.

Solicitor general Mehta-i, "Sorkari parnok tanaben anir arutsü aser parnok maitsüji asadangsü. Iba nungji ajemdaker onoki telemtetba agitsü," ta metetdakja liasü.

Centre sorkari Sunali Khatun den tangartem Bangladesh-i yoktsü telemtetba agia liasü, ajisüaka yaküm September 26 nü Calcutta High Court-i iba tetuyubaji agenja liasü.

Yaküm December 3 nü Supreme Court-i meimchir temeim nung ajemdaker Khatun den lar tanur (küm 8) na tanaben meyipa anir arutsü tetuyuba agüja liasü. SC-isa Bengal sorkar dang tanurji jungjunga anepalung ta tuyuba den külemi Birbhum district nung chief medical officer dang mashisa Khatun nem medical teyari agüjang, ta tuyua liasü.

Ano high court-ia Centre dang India nungi meindokba senso trokji ita ka tsüngda India-i anir arung ta tuyua liasü.

Yaküm parnok India nungi meindokba sülen Bangladesh nunga police-i parnok pua liasü.



August 19, 2026 nü New Delhi nung Congress lenirtem Congress Working Committee (CWC) senden nung adenba noksa nung angur. Iba senden nung taruba assembly elections atema o lemtepa liasü.

Telangana nung school principal tepsetba atema kaketshir ana apu

New Delhi, August 19 (Agencies): Telangana kübok Nalgonda district nung school director aser principal ka tepsetba dak sendakba nung class 10 nung azünger tebur ana puogo, ta Bodhbarnü police-i metetdaksü.

August 12, 2026 nü Nagarjuna Public School nung principal arrshi küm 49, Kallu Roopa Reddy lar kidang sür lia angu. La mang nung kotari agi atsüngba tarak 27 liasü.

Police-i ashiba agi, kaketshir ana jagi sen mechi nung principal tepset, ajisüaka osang angazükba agi kaketshir ana rongnungji katibo principal dang jashioka liasü.

phone ajanga tongtepratep mesütetba agi pai kiyonger police ka dang par kidangi odangang ta ashi. Ajioda police den kiyongertem kidang jagi odang nung la tasü mang angu.

Iba dak sendakba nung police-i la kinüngbu densema nisung 50 dang asüngdangyaa liasü saka kuli kecha mengutet. Tesüsa lar ki anasa aliba CCTV noksa ajanga tainlonglong lanur ka senzüba anguba nung ajemdaker police-i pa pua asüngdangyaa.

Police-i asüngdangyaba mapang nung lanur jagi pai aibelenba nangzük aser sen mechi nung pai la tepset ta metetdaksü.

Roopa Reddy ya la kinüngbu, Rajender Reddy den telidak liasü, ajisüaka la tepsetba anogo nungjibo pa Hyderabad nung liasü.

Hyderabad nunga par ki ka lir aser iba yimti nungji lar jabaso, Abhinav Reddy Engineering course agir.

Kinüngbu tena anogo asemnü Hyderabad nung amongba sülen la kinüngbubo mapa kar matemba agi meyipa maru saka labo August 10 nü meyipa arua liasü.

August 10 nüa la school-i ao aser school nung nikongdang 6:30 ako tashi liasü, ajisüaka tasügnüji la school-i maru.

Rajender Reddy-i la den

Police-i ashiba agi, August 11 aonung kaketshir anaji tejak nembanger Roopa Reddy'er kidangi ao; ka kima ata aser ka kilungi tua la dang sen meshia amokmeren. Ajisüaka lai sen agütsütsü memelungi atsütepba mapang nung tejak nembangba sü tsükba ajanga lai pa maitsü jangja, anungji pai kotari amshia la tsüngset.

Kaketshir ana jagi kidang nungjagi sen lakh 2.20 auyar ao aser police-i kaketshir ka ket nungi sen lakh 1.60 ngutetogo.

Osang angazükba agi, tamalen Roopa Reddy-i kaketshir ana rongnungji ka nem transfer certificate agüja school nungi meindoka liasü.



August 19, 2026 nü New Delhi nung Ambassador of Palestine to the Republic of India, Abdullah M Abu Shawesh-i osangbenertem den jembidang tangokba noksa nung angur.

Army tongti Seth aser Nepal PM nati defence tesendaktep atema jemb

New Delhi, August 18 (Agencies): Mongolbarnü Nepal yimtiba, Kathmandu nung Indian Army tongti, General Dhiraj Seth-i Nepal.Ato kilonser aser defence minister, Balendra Shah ajurua senden amendang tenati linük ana tsüngda tesendaktep atema jembiba den külemi defence tsütsü tesendaktep tajungba akümtsü atema jemb.

Nepali Army tongti general Ashok Raj Sigdel-i jaokba nung ajemdaker Seth-i anogo pezünü Nepal semdangba mapang Mongolbarnü pai Ato kilonser ajuru.

Iba senden nungji Indian Ambassador to Nepal, Naveen Srivastava-a liasü.

General Seth-isa Shivapuri nung aliba Nepali Army Command & Staff College semdang. Yangji pai sepaitem shisaliok aser security dak sendakba tayongzükba balala

lemsatepa liasü.

1950 küm nungi tenzüka India aser Nepal na sepaitem tsüngda tesendaktep lir. Iba tesendaktep kübok India aser Nepal nati 'honorary rank of general' agütsüteper.

Ajioda Hombarnü Nepal Tir Ramchandra Paudel-i General Seth nem Nepali Army honorary rank of General agütsüogo.

General Seth-i Nepal Army headquarters nung General Ashok Raj Sigdel den-a senden mena onük aika nung o lemtepa liasü.

India aser Nepal na tsüngda tesendaktep raksar aliba mapang ka nung Seth-i Nepal semdang. Talisa Lipulekh, Limpiyadhura aser Kalapani nung linük ana tsüngda arrtsü dak sendakba mangatettep adoka lir. India-i item tesem ya Uttarakhand shilem lir ta ashir aser Nepal-ia item tesem ya par litsü lir, ta ashir.



TIR YIMYIM YIMOBILEM (EDITORIAL)

DIMAPUR THURSDAY, AUGUST (LUROI) 20, 2026

Nübertem Onsara Mezüngmeshidaksür !

L angpangkonglen tawa tzünglu aruba mapang lenmang dang masü saka apu dena ponger aoba tatalokbatem ya tsüngsang mopong dang kisüng atongtsüla masü saka lenmang yanglur contractor-temi mapa kangasa meshitaki inyakba ajanga nübertem kanga akoksadagi ta Langpangkong nung lenirtemi yimjak nung metetdaksüba kanga tejashitsü osang ka lir. Atangji, tang ama tzünglu aruba mapang anentsü alutsü aser lenmang anenokaa aitsü. Itemjibo nisungi menokdangtettsü, ajisüaka lenmang yangludang oset shitak mamshi aser kilentzü junga meyangluba agi leman anenzüka aoba, apu chirepba aser motzü lenmang nung ayimtsüsa kilentsü junga meyanglui toktsüba ajanga atalokbatemjibo contractortemi dang masü saka minister aser engineertemi nübertem ashioktsüba mapa lir. Aji oda, highway yangluba mapa nung contractor-temi tajangzük tali angutsü arishidang long, lisem, cement, bitumen aser yin shitak mamshir, iba jagi lenmang yanglur küm ka majungdangyongi raksadoker. Aji oda, iron rod 16mm agitsüla nung 12 mm dang agira contractor-bo kanga ajangzüksü saka apuji nübertem asoshibo tasütsü sang sodaka yutsü amai lir, kechiyong ibaji ajanga gari tulu khu bener süidang chirepa lendong ataloktsü. Ibaji dang masü saka nübertem asoshi lenmang yangluba mapa nung lisem agitsüba ser nung long nungi menüngzükba 'stone dust' agiba, lisem tajung agitsüba ser nung lisem tamajung agiba, cement agi matu inyakba, iron rod tulu agitsüba ser nung tila agiba, tesem kar nung bitumen agi matu aser kar nung bitumen terongdok agi lenmang yanglutsüba, ano tesem aika nung motzü sademsadema ayimtsüsa kilentsü sademsadema yanglutsü melen ladakladaka yanglua toktsüba aser ano tesem kar nungbo lenmang tema nungang kilentzü yanglua toktsüba mapatemji nübertem hau ta mali mezüngmeshiba mapatem lir. Atangji, lenmangji contractor-i inyak saka pa inyaknüsü inyaksüba masü saka department-i DPR yanglur agüja lir aser DPR nung aliba mapa shitak inyakdaksütsü asoshi ketdangser Minister lir, terepranger aser tanüker Engineer lir, anungji item jagi repranga contractor-i mapa meshitaki inyaksü makok aser Minister aser Engineer-tem jagi mapa shitak inyakogo ta mashi tashi department-i contractor nem sen agütsütsü makok. Asen lima nung nübertem asoshi lenmang yanglutsüba mapatem nung tesüngmangtsü, tetamatsü aser tejashitsü kaji itemji lir. Kechi kodaser, iron rod 16mm agitsüba ser nung 12 mm dang agia yangluba apuji shitak yangluogo ta minister aser engineer-temi kuli agütsür ? Aji angatibo masütsü saka jenjang kanga tasak lir, kechiyong aji nisung lendongi idaksütsüba mapatem lir. Aji oda, lenmang teküpbok aser kilentzü tekalen ta yangluba kilentzüji shitak yangluogo ta minister aser engineertemi kechi kodaser shiteter ? Ajia angatibo masütsü saka jenjang kanga tasak, kechiyong iba jagi lenmang anenzüka odaksütsü aser nübertem timtem aser takoksa tulu ajurutsü . Aji oda, Nagaland nung, talisa, Ao lima nung gari lenmang mejungi yangluba ya contractor tai asü ? Ministerba tai asü ? Engineer tai asü ? Mesüra ajia nübertem tai asütsü ? Tanü Nagaland nung terenlok mapa junga meinyaktetbatem ajak telongpurtem dang atonger, ajisüaka shitakba nungbo Nagaland merenlokba timtem ya telongpurtemi masü saka tema nung ajungketa menden tajung nung mena alirtemi terenlok mapa inyaksüba sen amuzüka agiba ajanga meinyakteter. Aji oda, tang ama Highway shitak meyangluba atema Contrator kisüng aitsüba, ashiko, au pupet amai asütsüa akok. Aji oda, mapa shitak meinyakba atemaji nübertemi contractor dang masü saka ministerba o Engineerba na dang tama asüngdangtsüla, kechiyong mapa junga inyakogo ta kuli agütsür sen agütsüba tena mapa lir. Iba inyakyimji nübertemi memetetba agi parnoki nübertem kanga mezüngmeshir, kechiyong mapa junga meinyakbajibo tilaka dang saka parnoki mapa meinyak ser sen agizüka agiyonga asenokibo kecha mashir. Atangji, asenok ama ola madoktetba nübertemji, pei lima aser nübertem memeimertem asoshibo, mezüngmeshi tesünütsüka, anungji anosa mezüngmeshitsü !

OLEMSABANG

TEMESHI LAI NUNG ANÜDOKLENTIP (SOUTH) ANÜOLENTIP (NORTH) MEYOKTEPA AMSHIBADEM

~ T. Meren Paul, Kohima

(Yashi adok nungi...)

B. Temeshi Lai nung North ta zülua alibaAo nung Anüdoklentip ta meyipzükba

1. Lipok 28:14 North- Anüdoklentip- tai
2. Anitet 26:35North- Anüolentip - shidak,North- Anüdoklentip- tai, 38:11 North- Anüdoklentip- tai.
3. Züngdangba 34:9 Northern- Anüdoklentip -tai, 35:5 North- Anüdoklentip - tai
4. Joshua 8:11 North- Anüdoklentip- tai, 11:2 North- Anüdoklentip- tai, 15:6 North- Anüdoklentip- tai, 16:6 North- Anüdoklentip- tai, 17:10 North- Anüdoklentip- tai, 18:5 North- Anüdoklentip- tai, 14 North- Anüdoklentip- tai, 17 North- Anüolentip- shidak, 19 North-Anüolentip- shidak, 19:27 North-Anüolentip- shidak
5. Obendanger 7:1 North- Anüdoklentip- tai, 21:19 North- Anüdoklentip- tai
6. I Chuba 7:25 North- Anüdoklentip- tai
7. II Chuba 16:14 North-Anüdoklentiplen- tai
8. II Putipuyang 4:4 North- Anüdoklentip- tai
9. Job 37:9 North- Anüolentip- shidak
10. Tenüngsang ken 107:3 North- Anüdoklentip, tai
11. Solomon Ken 4:16 North- Anüdoklentip- tai
12. Isaiah 14:11 North- Anüdoklentip- tai13 North- Anüolentip- shidak, 41:25North- Anüolentip- shidak, 43:6 North- Anüolentip- shidak, 49:12 North- Anüolentip- shidak
13. Jeremiah 1:13North- Anüolentip- shidak, 15North- Anüdoklentip- tai, 3:12 North- Anüdoklentip- tai, 18 North- Anüdoklentip- tai, 6:1 North- Anüdoklentip- tai, 6:22 North- Anüdoklentip- tai, 10:22 North- Anüdoklentip- tai, 13:20 North- Anüdoklentip- tai, 16:15 North- Anüdoklentip- tai, 23:8 North- Anüdoklentip- tai, 25:9 North- Anüdoklentip- tai,26 North- Anüdoklentip- tai, 31:8 North- Anüolentip- shidak, 46:10 North- Anüdoklentip- tai 24North- Anüolentip- shidak,47:2 North- Anüdoklentip- tai,50:3 North- Anüdoklentip- tai, 9 North- Anüdoklentip- tai,41 North- Anüdoklentip- tai, 51:48 North- Anüdoklentip- tai
14. Ezekiel 1:4 North- Anüdoklentip- tai, 8:3North- Anüdoklentip- tai, 9:2North- Anüolentip- shidak, 20:47North- Anüolentip- shidak, 21:4 North- Anüdoklentip- tai, 26:7 North- Anüdoklentip- tai, 32:30 North- Anüdoklentip- tai, 38:6 North- Anüdoklentip- tai, 38:15 North- Anüdoklentip- tai, 39:2 North- Anüdoklentip- tai, 40:20 North- Anüdoklentip- tai,23 North- Anüdoklentip- tai, 40 North- Anoklentip- tai, 46 North- Anüdoklentip- tai,42:2 North- Anüdoklentip- tai, 11 North- Anüdoklentip- tai, 13 North- Anüdoklentip- tai, 44:4 North- Anüdoklentip- tai, 46:19 North- Anüdoklentip- tai, 48:1 North- Anüdoklentip- tai, 10North- Anüdoklen- tai, 16 North- Anüdoklentip- tai, 17 North- Anüdoklentip- tai,
15. Daniel 11:6 North- Anüdoklentip- tai,7 North- Anüdoklentip- tai,8 North- Anüdoklentip- tai, North- Anüdoklentip- tai,13 North- Anüdoklentip- tai,North- Anüdoklentip- tai,40 North- Anüdoklentip- tai 44 North- Anüdoklentip- tai
16. Amos 8:12North- Anüolentip- shidak
17. Zephania 2:13North- Anüdoklentip- tai
18. Zecharia 2:6 North- Anüdoklentip- tai, 6:6 North- Anüdoklentip- tai, 14:4 North- Anüdoklentip- tai,
19. Luke 13:29 North- Anüolentip- shidak
20. Tenyar Mapa 27:12 North- Anüdoklentip- tai
21. Jungkai Adok 21:13 North -Anüdoklentip- tai, South- Anüolen- tai, West -Anüolen tip - tai.

Temeshi Lai ya English den medemdanga azüngdang Ao nung tai meyipzüba aika ajeteter anungji reprangshitsü atema ABAMi shisadang nung ajungtsü südi ta nibo bilemer. Asen Aori English Laishiba aikatibo mazünger saka Ao Temeshi Lai dang azünger anungji tai meypezüka alibaji Tsüngrem O ama agir. Mezüng Lai meyperdemi Authorised King James Version Scofield amshiba angur aser angashiba agi iba sülen adoktsü yanglushidang Revised Standard Version amshi ta angazük saka Jubilee Edition nung English Standard Version amshi ama züngteter. Laishibaji koba version nungi meypezükdir tetenzük nungi tatem tashi iba version ji dang tanga version den memeyoktepi amshitsüla aser koba version nungi copy right temelaba agizük aji sayua alitsüla.

Arok Osep tasenba adoktsü yangluyaah aliba, revised edition nungjia tang tai meypezüka alibaji metongshia melenshir shidakbaji adoknung ajungtsü südi. Arok Osep page 26 second column nung ratet 8 puba Anüdoklentip ji North ta rateta lir aser page 27 second column nung ratet 5 puba Anüolentip ji South ta rateta alibaji melenshi shidak adok nung ajungtsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

West Bengal nung Protestant Khristan trok jail nung puok



August 16, 2026 nü West Bengal nung Medinipur district kübok Dharma Rohilla yimdak Khristanem tekülem sentong tagidak mapang nung Hindu nungertem arua amokmerendang tangokba noksa nung angur.

August 19, 2026: West Bengal nung Khristantemi tangartem Khristan yimsü dangi meyipdaksür, ta melung melemi Protestant Khristan trok pua jail nung puokogo.

August 16 (Amongnü) Hindu nunger telok kati Khristanem tekülem sentong tagidak mapang nung timtem agütsü, aser parnoki tai tongloksüba nung ajemdaker tetsür pezü densema Khristan trok apu.

Medinipur district nung aliba court kati tetsür pezüji judicial ket nung ayutsü aser tebur anaji police ket nung ayutsü tetuyuba agütsü. Iba ken o ya maneni August 21 nü angadangsü.

Mednipur district kübok Dharma Rohilla yimdak Asir Murmu-i, "Amongnü anepdang ozü kidang adenshia sarasadem sentong agia liasü. Ozü kibong nung züngsem ka shirang aneptsüba atema Tsüngrem

nem tenüngsang agütsütsü atema iba sentong ayongzüka temelungertem adenshia liasü," ta metetdaksü.

Paisa, "Hindu nunger telok jagi kidang osettsüset raksatsü aser onoki tangartem Khristan yimsü dangi meyipdaksür, ta onok nem tai tonglokja liasü," ta ashi.

Osangbener den jembidang class 12 nung azünger Sagar Palmal-i, "Ajungbena lokti ki telungi aitba sülen osettsüset raksatsü aser teka sangshiba ajanga ni kanga oksaa liasü. Tepuokdak puoka alirtem rongnung kütsü-a densema lir," ta ashi.

Bangiya Christiya Pariseba (Bengal Christian Council) coordinator, Victor Behara-i, "Parnoki tanur ajunga alir tetsürtem danga taochi mesayu," ta ashi.

August 17 nü Bengal Christian Council secretary,

Herod Mullick-i sangdong ka ajanga, parnoki tetsür-tanurtem densema tamangertem dak azük, ta metetdaksü.

Hindu nungertem jagisa police ajaba sülen tetsür 16 den tebur pezü apu.

Archdiocese of Calcutta nung Chancellor, Dominic Gomes-i, "State tesem balala nung item ama tatalokba osang aika lir. Iba ya ajanga state nung ozüng alema inyakba bulua akümba temaitsü sayur," ta metetdaksü.

August 18 nü Gomes-i ketdangsertem dang senso ajak kümzüka alitsü atema inyakang aser Khristanem anema inyakertem anema bushisüngdangang, ta mepishiogo.

All India Catholic Union nung otongdar, John Dayal-i, Bengal nung BJP sorkar aruba ajanga Hindu nungertem tasü itshiogo, ta metetdaksü.

Korea tsür missionary Park Tae-Yeon küm 17 tepuokdak ayutsüa akok



Missionary Park Tae-Yeon

August 19, 2026: Tawa apu.

Russia nung South Korea tsür missionary, Park Tae-Yeon anema asentenshir ken o angadang tenzükgogo aser la küm 17 tepuokdak ayutsü atema obendang agütsütsüa akok.

Arrshi küm 69, missionary Park ya taküm January ita nung

Russia nung Tsüngrem tenzükgba wadang küm 33 tashi inyakba sülen joko anisüngzüksü atema la South Korea-i meyipa aotsü hopta ka dang lia la apu.

Lai visa telatetbatem anema inyakba atema apu, ajisüaka

ANOGO ABEN TSÜNGREM DEN

Temoatsü mengutetba kuli kar

Meimchir ajak asoshi Tsüngrem ka lir aser aji ajaki amanger. Tsüngrem amangbaji tsübuba agi dang masü saka Pa nungi temoatsü kabosa angutsü imlaa amanger. Aji saka ajakibo iba temoatsü menguteter saka kariang nguteter. Anungji iba temoatsü kechiba menguteter, iba indang tatsüka zülur.

1. Tsüngremji tetsübubo tsübur saka mangateti tenzükgba aser amangba agi temoatsü mengutetter. Kechiaser Laishibai ashir, Kibuba atentena tenzükgang.
2. Tsüngrem tenzüker saka temenen den mepilai meyoktepa tenzükgba aser amangba ajanga menguteter, kechiaser Laishibai ni koma temeshi yamaji nenoka temeshi liang ta ashir.
3. Tenüng agi atatsübayong tenzükgba saka sentepsenji nung jangraa mali aser temulung nung Tsüngrem tsübuba shisatsü mali. Aji dang masü temulungjang nung Tsüngrem tenzükgba khuret mali, anungji ali nisung den atsüanem kaodokba agi temoatsü menguteter.
4. Arogo rongsenji temeshi aser Tsüngrem meyong ta mangateti dang alima rongsen ka ama zübazübaa amshiba ajanga temoatsü menguteter. Laishiba nung putir aser ainkar aika rongsen nung dang metsüdakba angur.
5. Kibuba mapa shibai anüalema inyakdir pa atakatem süang. Yer. 48:10.
6. Tsüngrem tsübua masü saka pei temetetba nung Tsüngrem ayutsü menangzükgba nung temoatsü angutsü melena temenen nem bendanga agütsü. Rom. 1:28
7. Alima maongka nungdang Tsüngrem tenzükgba ajanga kotaker temoatsü menguteter, kechiaser ibala nisung jagi alima maongka nungdang arogo nungji tenzükgba, saka tenzükgba nungji anenerbo talangka dang pilaa oadoker aser parnok jagi Yisu tanaben kangki nung angenloker aser yimjak nung maksüdaktsür. Ibri 6:6

Tang nungi asenoki Kibuba atentena aser meshiteta tenzüksü merangdi.

Ita 9 tsüngda osangtajung Yohan kaket download million 9 jungogo

August 19, 2026: Tesüiba ita ashi.

9 tsüngda internet searches "Search asürtem shia jagi billion ka ajanga nisung million langka bushir. Iba ama mapang aikati Laishiba aliogo, ta The ka nung Yisu ajurudaktsüsü Pocket Testament League-i atema onoki maongka tajung metetdaksü. angur," ta pai ashi.

2025 küm October 1 nungi Digital ajanga Lai azüngba taküm June 30 anogo tashi nung aser bushibaji talisa South Asia, iba Khristan ministry indang Africa aser Middle East nung online outreach search asüba alirtem liasü. Osangtajung million 750 liasü aser iba Yohan kaket teimtiba download ministry indang Read Carry asüba linükji India (3.68 million Share mobile app ajanga nisung downloads) lir, iba sülen million 9-i osangtajung Yohan tanabuba linükji Bangladesh kaket download süogo; iba (1.48 million downloads) lir.

tetezü ita shia download asüba Iba dak alia Khristanem million kaka lir. anema tenokdangba aika

2020 küm tatembanglen benoka aliba linüktem- Sudan, Read Carry Share app Nepal, Algeria, Iran, tenzükgba sülen tang tashi nung Afghanistan, Yemen, Pakistan, iba app download asüba million Ethiopia, Cuba aser Iraq nung 30 jungogo, aser iba app alirtema aikati osangtajung downloads shilem asemsü Yohan kaket download süogo. nungi kabo tesüiba ita 9 1893 küm tentetba Pocket tsüngda download asüba lir. Testament League-i mezüngbo

The Pocket Testament jurep (pocket) nung asemsüsa League CEO, David Collum-i, Laishiba tila aika adoka alem, "Iba züngya ya tesüngmangtsü ajisüaka tangbo alima tensa ka lir, ajisüaka tongtibangbaji mapang den apet parnoki internet nung search asürtem mobile technology amshia shiaji kanga tongtibang," ta ministry mapa inyaker.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züngtsüng

(n) teptsü atepdang au agi ajur amshiba oset (implement use in tattooing)

* Teptsü atepdang züngtsüng agi ajena yanglur.

Züngya

(n) kwi ta metettsü züluba zülüjang (number)

* Ken kaket nung ken züngya ajak agi 412 lir.

OLONG PAITEP # 76024

1			2			3			4	
			5		6		7			
8										
			9							
	10									
								11		12
			13				14			
15						16				

TIPLIN

1. Anenzükdak ki
3. Asür mangyimba
5. Temulung nung shisadang
8. T ___ lu
10. Takdang temalen
11. Tesa ___ a
13. Ajungbena temulungjang
15. Tejen lai nung tesayur
16. Tsüingsak-mopung

-

(5)

-

(5)

-

(5)

-

(3)

-

(9)

-

(3)

-

(5)

-

(5)

-

(5)

LANGTSÜNGLEN

1. Reprangdaksü
2. ___ ur
4. Kiojen yangludak
6. ___ ait
7. Nagaland nung ayong ka
9. Küm kasa purtem
10. Tetsüng tajemtdak
12. ___ adenshi
14. Tsünüsenbongtsü adokdak

-

(4)

-

(3)

-

(6)

-

(7)

-

(5)

-

(5)

-

(6)

-

(4)

-

(3)

OLONG PAITEP # 7603 TELANGZÜBA**TIPLIN :**

1. Aben, 4. Artsü, 7. Lisem, 8. Liwa,
9. Sarasadem, 12. Aket, 14. Mangu,
15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar,
6. Belem, 9. Sүjak, 10. Aonung,
11. Dokan, 13. Tinu.

NAI-A YA METETTER

August 14, 2026 nü Santa Rosa, California nung 2026 World's Ugliest Dog Contest nung Jinny Lu ta ser küm trok tain rescue pug kati iba takok marok nguogo. Iba tetoktepba ya Sonoma-Marin Agricultural Association-i Sonoma County Fairgrounds nung ayongzüka agi aser taküm agi küm 50 buba parnoki ayonga agiogo. Jinny Lu kibur Michelle Grady-i \$5,000 (approx. Rs 4,77,250) grand prize agizük.

KCP-Taibanganba Group züngsem 46 temai adok

Imphal, August 19, 2026

(Agencies): Kangleipak Communist Party (KCP)-Taibanganba Group züngsem 46-i Manipur sorkar aser security forces tsüngdang temai adokogo.

August 18, 2026 nü KCP-Taibanganba Group chairman dena telungpurtemi 1st Manipur Rifles Parade Ground, Imphal nung "Home Coming Ceremony" ka nung temai adoka liasü.

Parnoki prangpong 20 tema, injang 216 rounds aser tapoktsü asem bener arua agütsü.

Iba sentong nung Chief Minister Yumnam Khemchand

Singh-i tongti tesemdang ka ama le magi aser pai "Manipur nung tensa ajanga lanur aikati telungpur teloktem nung adentsü mulungtet, iba ajanga parnoki state kümüzka ayutsü ta amanga liasü" ta ashi.

Ajisüaka prangpong-injang ajanga yimjung aser terenlok mengutet aser telungpurtem temai adokba pelashishia agizüker ta pai ashi.

Manipur nung Revised Surrender-cum-Rehabilitation Policy, 2018 kübok telungpur 46 temai adokogo. Sorkari parnok nem skill development training agüja parnok tepok mesütsü

atema lenmang sayutsü ta CM Khemchand-isa ashi.

Manipur nung National Register of Citizens (NRC) update asütsü akhangba atema "state sorkari iba takhangba pusema nungiter aser Cabinet lemtet ka ajanga meratem agidar aser Manipur Legislative Assembly nunga bangzüng ka renemogo" ta CM Khemchand-isa metetdaksü.

Paisa mokdang ayongba teloktem dang lungkak aitba anentsü kechiyong iba ajanga nübortem libaliro nung kongshir ta mepishia metetdaksüogo.

Sep 2 nungi Manipur Assembly session tenzüktsü

Imphal, August 19, 2026

(Agencies): Manipur Governor Ajay Kumar Bhalla-i 12 buba Manipur Legislative Assembly indang tibuba session alitsü ayongzükogo.

September 2, 2026 anepdang 11:00 ako nung Assembly Hall, Imphal nung session tenzüktsü ta pai ashi.

Hombarnü Manipur Legislative Assembly Secretary Rohit Sapam-i iba sangdong agütsü.

Manipur nung Cabinet ulushitsü imlar ta jembiba mapang

ka nung Assembly session alitsü sangoktsüogo.

Iba session matongdang National General Secretary aser North East in-charge dena Central BJP lennirtemi Manipur semdangtsü sentongtem renema lir.

Taoba Chief Minister N. Biren Singh aser tongti lennirtemi taoba hopta New Delhi-i oa Union Home Minister Amit Shah den sendentem menogo.

Home Minister-i Manipur dak sendakba political onüktem jembitsü jaokba ama Biren Singh

Delhi-i ao ta osang angazüker.

Kasa mapang Home Minister K. Govindas, MLA Kh. Joykisan aser Speaker Th. Satyabrata nungeria Imphal toktsür ao aser iba ajanga state sorkar nung temelenshi kar asütsü akok ta nisungtemi jembir.

Manipur nung President's Rule agienba sülen Chief Minister Yumnam Khemchand Singh-i February 4, 2026 nü tezüngzüktep agia sorkar aküm.

Tang Manipur sorkar nung Cabinet züngsem pungu lir aser tenet tazüng lir.

AAI-i Majuli nung airport atema preliminary survey tenzüker

Guwahati, August 19, 2026

(Agencies): Airports Authority of India (AAI)-i Assam kübok Majuli nung airport ka yanglutsü atema asadangtsü tenzükogo.

Züngsem trok agi akümba AAI telok kati Majuli semdangogo aser airport yanglutsü atema tesem kar reprangdanga senzüogo.

Iba teshimtet telok nung Deputy General Manager asem- Sanjay Kaur, Khushial Singh aser

Parvinder Tiwari nung den Assistant General Manager Gaurav Kumar, Manager Rohan Maheshwar aser Assistant Manager Suresh Kumar nung lir.

Parnoki Jengraimukh nungi Kamalabari Darbar Chapori tashi tesem balala reprangdanga senzü.

Iba mapang Majuli Deputy Commissioner Ratul Chandra Pathak den district administration, police, transport

aser forest department nungi ketdangsurtem liasü.

"Iba preliminary survey ya Majuli atema mapa tajung ka lir aser tesem aika reprangdangogo. Jungjunga asadanga sülen ang tesem atema tatembang lemtet ka agitsü" ta DC Pathak-i ashi.

Taküm February ita Assam Chief Minister Himanta Biswa Sarma-i airport mapatong tasen pezü sangdongba nung Majuli airport ya ka lir.



Manipur nung Just and Fair Delimitation (JFD)-i ayongzükba sentong ka nung agiba noksa angur. JFD-i August 20, 2026 nungi state aser central sorkar office ajak mokdangtsü metetdaksüogo. Parnoki Census jakdang National Register of Citizens (NRC) tamasa inyaksü takhangba agütsür aser Mongulbarnü Bodbarnü JFD office, Wangkhei, Imphal East nung osangbener den jembidang iba osang metetdaksü. August 17 nungi JFD-i ghonda 48 general strike ayongba August 19-20 ayaterm nung tembangtsü ajisüaka Census jakdang NRC updation mezüng asütsü atema takhangba agüja maneni lungkak aittsü ta JFD convenor Jeetendra Ningomba-i ashi.

Imran Khan tang tashi mozü kidangi anir mao

Islamabad, Luroi/August 19 (Agencies): Pakistan indang Supreme Court-i Pakistan Tehreek-e-Insaf (PTI) tentetsang Imran Khan nija mozüki kati anir aotsü totuyuba agütsüba asoshi Pakistan federal sorkari review petition ka benokogo. Chief Commissioner of Islamabad-i iba petition ya Advocate General ajanga agütsü.

Khan ya tang tashi Adiala Jail nungi Shifa International Hospital-i anir mao, ta osangtem ajanga ashir.

Supreme Court-i August 18 nü interim order agütsüba anema federal sorkari ken o benok aser ibai SC indang jurisdiction alema aor ta ashi aser court dang repringhia iba totuyuba agientsütsü ayongzüka liasü.

Pakistan indang Supreme Court-i tepuokdak yua alisang taoba ato kilonser Khan ya tekeratiba nung Islamabad nung aliba Shifa International Hospital nung anir oa temang repringa anepalutsü totuyuba agüja liasü.

Khan'er kinunger aser okatsür temi Supreme Court dang pa nija mozüki dangi anir oa pai mulungba doctor tem

nem pa temang repringdaksütsü melaang ta asündangba sülen court-i iba totuyuba ya agütsü. Petition nungya Shifa International Hospital nung temang repringtsü aser Khan indang personal physicians temi repringtsü tejangja shia liasü.

Supreme Court-isa Khan mozü kidang temang anepaluba nung adokba senotsü paisa menoktsü tuyu.

Khan temang mejungi akumba, talisa pa tenük achichilen kanga mejungi akumba sülen iba ya ataloker alitsü. Adiala Jail ketdangsür temi Supreme Court nem report ka agütsüba nung pa Pakistan Institute of Medical Sciences (PIMS) nung temang anepaluba sülen pa tenük achichilen junga kumogo, ta ashi. Ajisüaka jail ketdangsür temi asadangba ya PTI-i magizük aser Shifa International Hospital nung Khan indang personal doctor tem nem repringdaksütsü maneni akhang.

Adiala Jail indang Superintendent ajanga Pakistan indang Supreme Court nem medical report ka agütsüba nung, blood pressure shidak

maliba, tekolok kanga anibelemba, petsaprongba, temulungjang kanga kera arakzüba aser tekolok angoba densema Khan-i ashibatem tejangja shia liasü.

Report ajanga ashiba agi, August 1, 2026 nü temang repringba mapang Khan-i blood pressure fluctuations, tekolok angoba, petsaprongba, temulungjang kanga kera arakzüba aser tekolok kanga anibelemba indang ashi. Pa temang ya PIMS Islamabad nung Professor Dr Akhtar Ali Bandishah, Consultant Cardiologist-i repringa liasü.

Khan indang blood pressure ya 140/100 mmHg liasü. February 2026 nung kasa cardiologist-i repring dang pa indang blood pressure ya 120/80 mmHg liasü.

Medical board-i Khan tekolok anibelemba ajemdaksütsü asoshi mera agitsü ashi. Aser item rongnung pa kinungtsü den mapang talangba ajuruteptsü aser tazüngtsü oset tem tapet agütsütsü dena liasü.

Report nungsa Khan temulungjang tali tejangjaba asadangtsü asoshi CT coronary angiography agitsü shia liasü.

US, South Korea nati military drills anogo ajemshir

Seoul, Luroi/August 19 (Agencies): South Korea aser United States na annual joint military drills anogo 11 agitsü aliba 5 dang kümtsüogo aser field training-a kar magitsü, ta linük ana yagi Bodhbarnü metetdaksüogo.

Tir Donald Trump-i US nunger sepaitem iba drill nung anogo ishiba shilem agitsü tetuyuba asütsüba sülen tang anogo ajemshio.

Chinese Foreign Minister Wang Yi-i South Korea semdangba mapang drill anogo melenshiba sangdongogo. Yi ya security dak sendakba nung sensaksemtsü atema South-i oa lir aser sensaksem mapang

Korean peninsula nung tatalokba balala indang jembitsü imlar.

Ulchi Freedom Shield exercise koba August 17 nü tenzüko, iba ya August 21 nü tembangtsü, ta South Korea indang Joint Chiefs of Staff aser Pentagon ketdangsür kati ashi. Iba drill ya August 27 nü tembangtsü liasü.

South Korea Defence Minister Ahn Gyu-i ashiba agi, drills' tanabuba shilem athitsü atema parnoki telemtetba agiogo, ta ashiba den mezüngbuba defensive drill agiba sülen counterattack operation tem atema drill agitsü imlar, ta shisem.

United States-i benokba sülen linük ana yagi drill anogo aser inyakyim asadangshitsü mulungtepogo, ta JCS-i ashi. Field manoeuvre training-a kar magitsü, saka tang tashi telemtetba magi lir.

U.S. Department of Defense ketdangsür kati ashiba agi, department-i, exercise aser live-training sentog kar thitsüogo.

Kasa mapang nung North Korea-i iba military ecercise agiba aija arudar aser Bodhbarnüa parnok kümzüka ayutsü atema jenjang agitsü, ta shiogo. North-i ashiba agi, iba exercise ajanga Washington aser Seoul nati parnok amokmerener.

June ita züngzüktepa ama US-i meinyak tashi Hormuz shibangtsü

Dubai, Luroi/August 19 (Agencies): US-i June ita Iran den interim deal zülutepba nung shia alibatem meinyak tashi Strait of Hormuz shibanga alitsü, ta top Iranian negotiator Mohammad Baqer Qalibaf-i ashiba state media nung Mongulbarnü sangdonga liasü.

Item teinyaktsütem rongnung, US-i Iran nunger rongnendak tesemtem mokdanga aliba agientsü, totzü nokdanga aliba agientsü, Tehran indang rongsen soita aliba salatsü aser tesem ajungalen

amokmerenba aser military operations tem tembangtsü dena lir, ta Qalibaf-i parliament nung ashi.

Iba memorandum of understanding ya June 17 nü zülutep, saka kanga kera Strait of Hormuz azüoktsü mangatetp dangi melen, koba ajanga rara metenzükdang alima nung totzü aser liquefied natural gas shilem 20 shi bena liasü.

US Tir Donald Trump-i iba tezüngzüktep ya July 7 nung tembangogo ta ashi aser hopta ka lir Iran indang foreign ministry-ia

ibaji soiter ta sangdong.

Iba MoU kübok Iran aser US nati tatembang tezüngzüktep ka asoshi jembishinütsü pangjema liasü, kong Iran indang nuclear sentong densema ken o balala anogo 60 tashi jembitsü aser ajaki mulungtepa mapang atsülangtsü ta zülutep.

Teti asoshi iba rara tatem kati arutsü atema jembishinüba nung anendaka lir asünungji, Iran ya "fully offensive" posture dangi melentsü, ta Iran ketdangsür kati osangbener dang Hombarnü ashi.



OFFICE OF THE

LANGPANGKONG KAKETSHIR MUNGDANG

Langpangkong Students' Conference

H.Q Chuchuyimlang- 798614, Dist. Mokochung: Nagaland

Email: Langpangkongkaketshirmungdang@gmail.com

TENÜNGSANG AGÜTSÜR

NPSC ajanga ketdangsüa agiba NPSC-CSE 2025 tatidang osang tawa sangdongba nung ozü Langpangkong nangpong Sb. Yimpangakum Imsong, S/o Wb. P. Bendangwapang Imsong aser Wt. Moalemla Jamir (Yaongyimsen), pai Treasuries & Accounts Department, Govt. of Nagaland kübok Assistant Auditor (Class III Non Gazetted) menden ajangzükteta taküm nükmén amentetba den Tzükongsaenger rangben tejak tentetdaksü nung asen Langpangkong Kaketshir Mungdang (LKM) mendenti ajanga lenir nem takok konang nüngsang tulu agütsür. Sorkar aser nübur tenzükbä wadang nung Tsüngremi ne taküm, sempet maneni temjena moajang ta asen Kaketshirtem tamang sarasadem.

Sd/-

Tzüwasanen

President, LKM

Sd/-

Walunir

General Secretary, LKM

TENÜNGSANG AGÜTSÜR



Tsüngremi mezüja shimtetba, Asür Watimendang aser Toshilemla Imsong na jabaso, **Bendang Walling**-i Arts (Theatre, Film making & Acting) 2026 nung Governor's Award for Distinction ngutetba asoshi kinunger temi nüdang kanga pelar aser Tsüngrem nem tenüngsang agütsür. Ano maneni nü wadang nung Tsüngremi len aniang ta kinunger temi sarasademsür.

Temeim Oja, Tantsü, Tanutsü aser Okolatem.

Russia-i maneni Ukraine nung nisung 5 tepset

Kyiv, Luroi/August 19 (Agencies): Russia-i Ukraine amakba sülen nisung pongu tepset aser nisung 11 yirutsüogo, ta ketdangsürtemi metetdaksü.

Arrtsü nung aliba Kherson yimti nung Bodhbarnü Russia indang drone kati bus ka amakba sülen nisung pezü tepset aser nisung pezü yirutsüogo, ta Kherson regional Governor Oleksandr Prokudin-i ashi.

Iba bus ya anepdang 8:50 ako shi nung amak aser asürtem ajak ya bus nung mena aliba passenger tem liasü.

Telegram app nung post ka ajanga Prokudin-i ashiba agi, yirur alirtem mozükidangi aniogo.

Russia nunger sepaitemi Kherson ya mapangshia maka arudar, koba 2022 küm March nungi November tashi Russia-i atsünger liasü. Ukraine-i ashiba agi, Russia-i asa-a civilian tem amaker.

Iba ita tetenzüklen Kherson nung shishilembadak ka nung drone kati nisung ka arishiba atema Ukraine-i Russia aitsüogo, aser ashiba agi iba ya civilian tem dak rangloker inyaksangshiba lir.

2022 küm February ita nungi Russia-i Ukraine maka rara metenzük tsüngda iba yimti nung nütsüngyongsük 280,000 shi liasü. 2022 küm tatemlen Ukraine nunger sepaitemi Russia nunger sepaitem iba yimti nungi mintoka liasü.

Taküm rara nung civilian tem aika asüba osang angazüka arudar, aser United Nations-i ashiba agi, Ukraine nung taoba ita kija nunga civilian 437 tepsetogo, koba 2022 küm May ita sülen ita ka nung nisung timtiba asüba asütsü.

Russia nunger ketdangsürtemia July ita Ukraine-i tesem balala amakba mapang civilian 79 tepsetba metetdaksüogo.

United States teyongtsüi ia yimjung atema sensaksemba bangdaker aliba mapang küm pezüser tesadang rara ya tamajungba ang küma odar.

Maneni Zaporizhzhia yimti amakba mapang nisung ka tepset aser nisung tenet yirutsüogo, ta regional Governor Ivan Fedorov-i ashi.

Russia nunger drone temi iba yimti amakba sülen nisung aliba ki aser nisung maliba kitem dak kongshio aser iba ajanga mi adokdakja liasü.

Kasa mapang nung Russia nunger sepaitemi Ukraine kübok Odesa rongnendak anasa Black Sea nung khu abenba rong ka makogo, ta Ministry of Defence-i metetdaksü.

Iba rong nung military oset bener liasü, ta ministry-isa shisem.

Ministry-i ashiba agi, parnok indang air defence-i linük kübok tesem balala nung manger mesangwa tsüngda Ukraine nunger indang drone 453 khazüka yokogo.

Nagaland Pickleball Association inti senden menogo



Dimapur, Luroi/August 19 (Agencies): Nagaland Pickleball Association (NPA) inti senden August 16 nü menogo. Senden nung taoba küm tsüngda Association-i ajangzükteter alibatem lepa repringshi, aser Nagaland nung pickleball asaya terenlok asoshi onük balala benoka sensaksemogo.

Senden nung taoba küm tsüngda iba asaya terenlok aser asayamungtem ayongzüka asayaba asadang aser iba den structured competition tem, asayartem renloka aoba asadangtsü aser nisung timba nem shilem agidaksütsü atema sensaksemogo.

Senden nungsa formal state-level ranking aser digital tournament system ka amenöksü bangjem. Rankings, tournament registration, scoring,

aser event management atema FLEG ya official digital partner asütsü shimogo.

FLEG ya sports-tech ecosystem ka ama inyaksangshir, aser iba ajanga asayar, asayaba tesem, coach tem aser Nagaland o Northeast India nung asayamungtem sendakteptsür.

NPA-isa, court tem indang jenjang yanglushitsü, certification ajanga qualified referee tem anitetsü aser sensaksem ajanga court kiburtem nem shilem agidaksütsü sensaksemogo.

Taruba season atema Kohima aser Dimapur na nung official state asayamung ana asoshi sensaksemogo, koba September aser October ita asayatsü tebilemba lir. Association-isa, teshimtetba asayar kar IPA Nationals-i

yoktsü atema sentongtem sensaksemogo. Nagaland team ya October ita shimtsü aser iba atema osang tejangja mapangtong nung agütsütsü.

Maneni grassroots nung terenlok koda tongtibang indang indang sendaksemogo aser iba atema school tem den tongteptsü, educational institution tem den tenangzüktepba yanglutsü atema lenmang bushitsü aser sempet aketba asayartem bushiteta aotsü aser lanurtem nem shilem agidaksütsü sensaksemogo.

Association-isa, coaching certification programme tem aser tetsür coaching clinic tem ayongzütsü lemtetogo.

Tesendaktep akangshitsü aser inyakyim merekmereka aotsü atema ita shia senden amentsü telemtetba agiogo.

Cincinnati Open: Sabalenka round 4bubai iogo; Medvedev tsükogo

Luroi/August 19, 2026 (Agencies): Tang asaya aliba Cincinnati Masters tetsür kija asaya nung world number one Aryna Sabalenka-i China tsür Wang Xinyu 6-1, 6-3 agi koka round pezübuba tongtetogo. Kasa mapang nung Daniil Medvedev bo mimlai lia Brandon Nakashima-i tsükdaksüogo.

Sabalenka taruba asaya Czech tsür Sara Bejlek den asayatsü, shibai Ekaterina Alexandrova 4-6, 6-1, 6-2 agi kokogo.

Tetsür kija asaya nungsa fourth seed Coco Gauff-i külem America tsür Ann Li 6-1, 7-6 (7/3) agi kokogo.

French Open tetsür kija asaya koker alila Mirra Andreeva-ia 6-1, 7-6 (7/5) agi Janice Tjen madak takok nguogo.

Indonesia tsürla yagi mezüngbuba set bo junga masayatet saka tanabuba set nungbo Andreeva nem kanga timtem agüja liasü.

Ajisüaka tia maka eighth

seed Elina Svitolina bo tetsüng yiruba ajanga Wang Xiyu den asayatsü aliba asaya nung masayatetsüsa aküm.

Kasa asayamung tebur kija asaya nung Canada nunger second-seeded asayar Felix Auger-Aliassime-i 7-5, 6-1 agi Argentina nunger asayar Juan Manuel Cerundolo kokogo.

Washington nung takok angusang aser fifth seed Taylor Fritz-i Daniel Merida den asaya nung ace ti tashi oteta asaya 6-3, 6-4 agi minute 83 nung kokogo.

Maneni taoba hopta Montreal nung final tonga asayar alisang Nakashima-i set ka mekoki aliba nungi meyipa tur fourth seed Medvedev 6-7 (3/7), 7-6 (7/4), 6-1 agi kokogo.

Italy nunger asayar Lorenzo Musetti-i America nunger asayar Michael Zheng 6-1, 6-3 agi kokogo.

Ano Portugal nunger asayar Nuno Borges-ia 2021 runner-up Andrey Rublev 6-3, 6-4 agi koka liasü.

Musiala tanabenbuba ground telung nung lao



Luroi/August 18, 2026 (Agencies): Anogo pezü tsüngda tanabenbuba ground telung nung laoba sülen Bayern Munich midfielder Jamal Musiala pa "neurological dysfunction" ka atema temang anepaludar ta ashi.

Mongolbarnü Heidenheim pur goal 4-2 agi akokba asaya nung substitute ama aiba sülen minute trok dang lir Musiala laoa liasü.

Medical teyari agütsüba mapang arishi küm 23 tain asayar ya mangmanger ama repringtetogo aser iba sülen pa ground nungi anir tugua liasü.

Honibarnü Munich nung RB Leipzig den friendly asaya ka goal 3-1 agi akokba asaya nunga pa laoa liasü.

Iba sülen mapang tatsüka lir Musiala-i nüburtem tsübua melidaksütsü atema Instagram ajanga olen ka lemsatepogo.

"Neurological dysfunction ka ajanga ni khen atema saka anepalutsü akokba tashidak ka

putetogo," ta pai ashi.

"Iba ajanga tawa Leipzig aser Heidenheim nung kü dak iba ya atalokogo. Ya mezüngbo tetsübutsüka saka kü atemabo iba ya tang kü taküm nung anogoshia tatalokba ka lir.

"Ni tang temang anepaludar aser taneptsü angutsü ta temulung lema bilemer. FC Bayern, ozü kibong aser medemertemi ni kanga nongita yaria arudar," ta pai ashi.

Mongolbarnü asaya sülen Bayern sporting director Max Eberl-i, asayari iba ken o ya mapang tatsüka lir metetdaksütsü ta ashiba den onoki iba indang meteter liasü ta shisem.

"Jamal-i jembitsü. Pa tang dressing room nung tzü chikoa süoshi melendar," ta pai ashi.

Musiala taoba season tetsüng raksaba ajanga ita trok masayatet, saka pa season tanabuba shilem nungbo asaya aser Germany tenüng nungi World Cup nunga asayaogo.

India-i run 165 agi Sri Lanka kokogo: Suthar-i wicket 10 agi



Manav Suthar

Luroi/August 19, 2026 (Agencies): Galle nung India aser Sri Lanka na mezüngbuba Test asaya India-i run 165 agi kokogo. Iba asaya nung left-arm spinner Manav Suthar-i wicket 10 agia liasü.

Suthar ya tang agi tanabuba Test nungang asayar liasü, aser pai ball kanga junga ona India-i Test asaya 600buba asayaba mapang takok anguba nung teyari agütsüogo.

Pai mezüngbuba innings nung wicket 4 agi aser tanabuba innings nunga run 55 agütsür wicket 6 agi Sri Lanka nunger asayartem run 206 dang yangludaksür ajak out sütsüba nung teyari agütsü.

Asaya akoktsü atema run 372 arishiba mapang Sri Lanka nunger batter temi junga masayatet. Parnok rongnungi Sonal Dinusha-i dang junga asayateta innings anaprongla nung pai run timba yanglu

Mongolbar nü asayar 4 out ser run 84 yanglu anogo tembangba sülen India-i anepdang session nung Sir Lanka nunger asaya ana out sütsü.

Captain Dhananjaya de Silva (59) aser mezüngbuba innings nung century yanglusang Dinusha nati ghonda ana dak tema takok tashi meranga asaya aser run 95 bendenloksü.

De Silva-i pa indang career

nung half-century 20buba yanglu, saka Ravindra Jadeja-i ball aonba sweep asütsü merangba mapang fine leg nung Suthar-i pua out asü.

Wicketkeeper Niroshan Dickwella-i mezüngbuba innings nung half-century ka yanglu, saka tanabuba innings nungbo junga masayateti run 10 dang yanglu.

Suthar-i lunch sülen over ka nung run ka danga magütsüi wicket asem agi aser taruba over nung tatembangbuba asayar Keshara Nuwantha out süja liasü.

Sri Lanka nunger tatembangbuba asayar pezü ya run tenet dang yanglur out süatok.

Arishi küm 25 tain Dinusha (84)-i kanga junga asayaogo, saka pa nem teyari agütsür maliasü.

Suthar den ano India nunger asayar rongnungi top-order batter Devdutt Padikkal-ia innings ana nung run 167 aser 44 yanglua kanga junga asayaogo.

Team ana ya Deobarnü nungi tenzüka Colombo nung tanabuba Test asayatsü.

BILEMDANGANG

"Nüsasa na meimang."